

## **EHU: Euskal Herrian tinko erroturik munduko plazara jalgi**

Mundu mailako izurriteak inoiz bizi izan ez dugun egoera batean utzi gaitu. Herritarrak ezagutza zientifikoari begira jarri gara, zientzialariek ataka latz honetatik aterako gaituztelakoan.

Gure herri zatituan ezagutza zientifikoaren sortzaile nagusi dugu Euskal Herriko Unibertsitatea. Produkzio zientifikoaren zenbakietatik harago, azken hilabeteetan EHUKo ikertzaileen ekimenek (berrikuntzak PCR testak egiteko, adibidez) eta agerraldi publikoek hedabide ezberdinetan balio izan dute, instituzio politikoek jarritako oztopoen gainetik, euskal herritarrek unibertsitate publikoarekiko konfiantza areagotzeko. Bistan da XXI. mendeko arrisku berrien aurrean EHUK baduela asko eskaintzeko Euskal Herriko gizarteari.

Ostegun honetan izango dira EHUKo Errektore berriak aukeratzeko hauteskundeak. Inkognitaz beteriko testuinguru bati aurre egin beharko dio unibertsitate publikoak datozen urteetan, alegia, oztopo eta muga asko gainditu beharko ditu: finantziario publiko eskasa, oraindik ere hamarkadaren hasierako neurrietara helden ez dena; egungo behin-behinekotasuna gainditzeko enplegu egonkorra eskaintzeko oztopo legal eta ekonomikoak; ikerketa bermatzeko behar beste baliabide ez izatea. Horri gehitu behar zaio Jaurilaritza osatzen duten alderdiek, baita beste eragile pribatu zenbaitek ere, Bilbon zein Gasteizen bultzatutako “unibertsitate” pribatuen ugaritzea, geraraztea ezinezko izango dena lege-esparrua aldatu ezean.

### **Euskal Herrian tinko errotutako unibertsitate publikoa**

Unibertsitatea euskararen lurraldean erroturik nahi dugu, ez soilik EAera begira dagoena, ezta unean-uneko Gobernuen men egingo diena ere. Bai, aitzitik, bere autonomia defendatuko duena.

Euskal gizarte demokratiko eta aurrerakoiaren beharrak aintzat hartzen dituen unibertsitate publikoa defendatu behar dugu, olatu neoliberal indartsuari aurre egiteko. Eta etxetik bertatik abiatu behar gara: langileen ezegonkortasuna, lan-jardunaren partzialtasuna eta baldintza onartezinak gainditzeko neurriak bultzatuz; gure herriko enpresa txiki-ertain, kooperatiba eta askotariko eragile sozialekiko elkarlana sendotuz; gizarteak eskatzen dituen zerbitzu publikoen inguruko gogoeta eta proposamenak landuz; bakegintza eta elkarbizitza demokratikoa lortzeko bidean, euskal presoak herriratzeko ahaleginetan lagunduz; Euskal Herrian diren unibertsitate publiko guztien zein herri ikuspegia duten gainontzekoekiko lankidetzaren aldeko hautua eginez, horrek gure herriaren egituratzean lagundu dezakeelakoan.

Gure berezko hizkuntza den euskara irakaskuntza-, ikerkuntza- eta zerbitzu-hizkuntza izan dadin sustapen sendoa egingo duen unibertsitate publikoa nahi dugu, gure egoeratik abiatuta, baina helburu argia izanik: euskara unibertsitate-eremu eta plaza guztietan normaltasunez erabilia izatea.

Euskal gizartearen premiak kontuan hartuko dituen ikerkuntza-lerroak sustatzeko zein nazioarte mailan lehenesten diren ikerketa-ildoak gauzatzeko behar beste giza baliabide zein ekonomiko bermatuko dituen unibertsitatea ezinbestekotzat dugu.

Genero berdintasunean eredugarria izatea, orain arteko egitura ahulak sendotzeko (Berdintasunerako Zuzendaritza, Berdintasunerako Batzordeak zein Hezkidetzak Batzordeak), eta egitura horiek askotariko baliabideekin hornitzeko lan egingo duen unibertsitatea sustatu nahi dugu, egiten den lanari eta egiturei ikusgarritasuna bermatuko diena. Eta helburu horiek erdiesteko unibertsitateko bestelako taldeekin (talde feministak, LGTBiak) elkarlanean aritzea ezinbestekotzat joko duen unibertsitate publikoa nahi dugu.

Langileen lan-baldintza egokiak bere baitan bilduko dituen euskal lan-harremanen marko bat lortze aldera arituko den unibertsitatea behar dugu. Ildo horretan, irakasle, ikerlari eta administrazio eta zerbitzuetako langileen artean dagoen behin-behinekotasun eta partzialtasun tasa handia nabarmen jaitea, langile guztiok soldata duinak izatea eta EHUn dagoen enplegu mailari eustea bultzatuko duen unibertsitate publikoa defendatuko dugu.

Gradu eta graduondoetara ikasleen sarbide unibertsala bermatzeko, tasak, lehen zein bigarren eta ondorengo matrikulak jaitsiko dituen unibertsitate publikoa izan behar da gurea. Bide batez, inork unibertsitatean ikasteko aukerarik gabe gera ez dadin beken politika egokia bultzatuko duena. Eta noski, ikasleak unibertsitateko eragile aktibotzat hartuak izan eta haiekiko behar den begirunez jokatzeko sustatuko duena, jokabide autoritario eta errepresiboak albo batera utziko dituena.

Kudeaketa demokratiko eta parte-hartzailea, gardentasuna, eztabaida zabala eta izpiritu kritikoa ipar izango dituen unibertsitatea behar du izan EHUK. Horretarako, komunitatearen gehiengo demokratikoen eta instituzioaren eginkizunak eta beharrak lehenetsiko dituena. Errektorea hautatzeko zein barne-funtzionamendurako araudia egokitzearen eta gaurkotzearen alde arituko dena.

Horrela ulertzen dugu guk bikaintasuneko unibertsitatea. Marraztu dugun unibertsitate-eredua partekatzen duten komunitateko kide euskaltzale eta ezkertiarrek gonbidatzen ditugu datozen urteetan horren alde lan eta borroka egitera.

**Mila Amurrio, Koldo Callado, Oskia Agirre, Ekaitz Zulueta, Estitxu Garai, Gabi Elkoroaristizabal, Gema Lasarte, Joxi Imaz, Marimar Lledó, Kike Fernández, Lorea Mendiola, Javi Ibarra**